

DECRETO DE LA SIGNATURA APOSTÓLICA DE 28.V.1993

23805/92 V.T.

N.

Quaesita

Litteris diei 1 octobris 1992 Rev.mus Vicarius iudicialis N., atenta peculiari rerum conditione in eadem dioecesi, quoad causas nullitatis matrimonii inter non catholicos —sive baptizatos sive non— contracti, quaesivit an Ecclesia catholica iurisdictione gaudeat ad videndum de nullitate huiusmodi matrimonii, et quatenus affirmative, utrum in casu requiratur processus iudicialis, necne.

SUPREMUM SIGNATURAE APOSTOLICAE TRIBUNAL

Attento quod ad normam iuris constare debet de libero statu contrahentium, qui coram Ecclesia catholica matrimonium petunt, quam ob rem Ecclesia ius habet et officium de re videndi (cfr. cann. 1066; 1085, § 2; 1113-1114);

Perpenso etiam quod ius processuale canonicum agnoscit habilitatem coniugum etiam non catholicorum impugnandi matrimonium coram iudice ecclesiastico (cfr. can. 1674, n. 1, coll. cum can. 1476), quodque huiusmodi coniux «interesse» ad rem requisitum (cfr. can. 1501) sine dubio habet, si novum matrimonium cum parte catholica coram Ecclesia catholica inire intendit;

et perspecto quod iudex ecclesiasticus in casu ad normam iuris canonici procedere debet;

Animadverso quod hic non agitur de comprobando, per investigationem praematrimoniale, statu libero eorum qui, etsi ad canonicam formam adstricti, matrimonium attentarunt coram civili officiali aut ministro non catholico;

Considerato voto a Rev.mo Consultore exarato;

Vi art. 124, n. 1, Const. Ap. «Pastor bonus» (cfr. can. 1445, § 3, n. 1);

Re sedulo examini subiecta in Congressu, coram infrascripto Pro-Praefecto die 12 decembris 1992 habito,

declarat:

Ecclesia Catholica iurisdictione gaudet ad videndum de nullitate, vel minus, matrimonii inter non catholicos contracti, si unus eorum cum parte catholica novum inire matrimonium intendit. In casu, adhibendus est processus iudicialis ad normam cann. 1671-1691.

Datum Romae, e sede Supremi Signaturae Apostolicae Tribunalis, die 28 maii 1993.

+ GILBERTUS AGUSTONI, Pro-Praefectus
+ ZENON GROCHOLEWSKI, a Secretis